

Fastewaie-Clique



1. Die Billetstür wird durezwängt
Es het kai Teifel gnutzt
Zum Referendum hets nit glängt
Doch jetz e Mänge stutzt.
Und sait im Stille, o ich Kueh
Jetz laufe d'Lit erst rächt im Kino zue.
2. Es sitzt e Ma im Grosse Rot
Wo gärn sich schwätze heert
D'Materie er zwor nit verstoht
Doch iber alles schneert,
S'isch wirgglig schaad, dass sone Ma
Nit iber d'Grenze gschoobe werde ka.
3. Doch mit Millione spart me nit
Fir neie Wohnigsbau
Damit, wenn's gniegend Arbet git
Me mache ka Radau
S'wär wirklich schaad, wenn not-i-no
Dr Streik und Krach tät us der Mode ko.
4. Die Mustermess-Genossenschaft
Wird grindet mit viel Krach
Sie stigt mit grosser Lideschaft
De Hotelier uf's Dach
Verdiene darf nur's Komité
Und jo nit ebenau der Hotelier.
5. Es wird e Flugfest arrangiert
Duss ufem Sternefeld
Die halbi Stadt derthi spaziert
Will ebbis seh firs Geld.
Die Passagierflieg sin brilland
Doch d'Brügelei vorher, das isch e Schand.
6. Kadette, Fechtenunterricht
En gar e grossi Gfohr,
E Gwehr goht los, e Sebel sticht
Scho sit viel Hundert Jahr
Drum findes d'Sozi hechsti Zit
Z'verweigere der Kredit.
7. Die Baselstäb sin fascht verheit,
Bi d'r Tramiweihigsfahrt
Ganz Muttentz schwimmt in Seligkeit
Wie's Baselbieterart.
Isch me sunscht au wie Hund und Katz
Im Tram und Wirtshus isch fir alli Platz.
8. Die Usverkauf und Abbauwuet
Stoht jetz in grosser Gunst
Dr Knopf, dr Gleb, dr Blech, dr Guet
Gänn d'Sach fascht umesunscht
Unds Publikum, das goht uffs Ys
Und kauft die Ladehüter hiffewis.
9. Was isch das fir e Klexerei
An Muure und an Wänd
Das isch moderni Molerei
Het weder Fiess no Händ
Es finde viel vernimftgi Lit
S'seig jammerschad doch fir dä Kunstkredit.
10. Die grossi Soziherrlichkeit
Isch endlig gange futsch
Die Rehti predigt Einigkeit
Die Linki will dr Putsch
Und z'oberst uf dem Russemist
Der Schneider tront als Kommunist.

